



Sakspapir

SAKSGANG

Utval	Møtedato	Saknr
Formannskapet	09.09.2015	050/15
Kommunestyret	09.09.2015	056/15

Arkiv: K1 - 232

Arkivsaknr: 15/1119 - 9

Sakshandsamar: Siri Fahlvik Pettersen

Eigedomsskattelova - Høyring som gjeld endring av eigedomsbeskatning av arbeidsmaskiner i verk og bruk

Kort om saka:

Finansdepartementet sendte den 18 juni 2015 ut høringsnotat med to alternative forslag til at kommunane ikkje lenger får skriva ut eigedomsskatt på verk og bruk. Høringsfristen er sett til 18. september 2015. Begge alternativ gjev store økonomiske konsekvensar for Øygarden kommune.

1. Produksjonsutstyr og installasjonar vert fritekne for eigedomsskatt.
2. Verk og bruk fell bort som eigen kategori og denne type eigedommar vert skattlagt som nærings eigedom.

I forslaget går det fram at endringane vert gjort gjeldande frå 1. januar 2017. For Øygarden kommune vil inntektsbortfallet utgjera om lag 117,5 mill kr. Dette er om lag 23% av kommunens budsjett. Omrekna til årsverk utgjer dette 228 årsverk.

Forslaget kjem som ei oppfølging av Sundvollen- erklæringa frå 7. oktober 2013 (regjeringsplattforma utgått av Høgre og Framstegspartiet) Kommunane har soleis vore kjend med at ei omlegging av eigedomsskattereglane kunne koma. Større endringar i det økonomiske opplegget vert oftast varsla i Kommuneproposisjonen som kjem kvar vår. Dette skjedde ikkje i år og soleis kan ein seia at forslaget kom uventa. Forslaget er dramatisk og omfattar i følgje KS 343 av landets 428 kommunar. Industri- og petroleumskommunane har mykje produksjonsutstyr og arbeidsmaskiner med definisjonen «ikkje integrerte maskiner og utstyr». Difor vert desse kommunane hardast råka av forslaget.

Dokument vedlagt saka:

Dok.dato	Tittel	Dok.ID
19.06.2015	Høringsnotat om eiendomsskatt på arbeidsmaskiner.docx	161684
25.08.2015	KS-Hoeringsuttalelse-VerkBruk-21082015.pdf	165700
02.09.2015	150831_b_fin_høring_verk_bruk_produksjonsuts	166380

Aktuelle lover, føresegner, avtaler, planar:

Eigedomsskattelova, kommuneplan, budsjett med økonomiplan

Saksopplysningar:

Det ligg føre høyringsnotat datert 18. juni 2015 frå Finansdepartementet med forslag om endring i reglane om eigedomsskatt på arbeidsmaskiner mv. i verk og bruk i lov 6. juni 1975 nr. 29 om eigedomsskatt til kommunane (eigedomsskattelova).

Framlegget byggjer på det regjeringa utgått frå Høgre og Fremskrittspartiet sa om eigedomsskatt i Sundvolden-erklæringa: «*Frita fastmonterte, ikke-integrerte maskiner fra eiendomsskatt i industrianlegg (gjelder ikke kraftanlegg)*».

Forslaget omfattar:

1. Produksjonsutstyr og installasjonar vert fritekne for eigedomsskatt.
2. Verk og bruk fell bort som eigen kategori og denne type eigedommar vert skattlagt som næringseiendom.

Forslaget inneber at bedrifter får redusert skattebyrden monaleg. Kommunar som er omfatta av endringane får store inntektstap medan staten får auka inntekter.

Finansdepartementet meiner forslaget gjev eit inntektstap for kommunane på 1,2 mrd kr kroner. KS har etter gjennomført undersøking i kommunane stipulert inntektstapet til 1,7 mrd kr.

Fleire store bedrifter som vert omfatta av forslaget er statseigde selskap (Statoil, Gassco, Statkraft, Statnett). Dei vil som følgje av omlegginga få letta skattebyrden monaleg, noko som igjen vil føra til auka utbyte til staten. Dei store selskapa vil i følgje forslaget ikkje få føra eigedomsskatt som frådrag. I tillegg vil staten kunna henta inn meir selskapsskatt som Finansdepartementet har rekna til å koma på om lag 300 mill kr.

Når det gjeld petroleumsverksemda sin særskatt til staten vil denne i forslaget også auka. Advokatfirmaet Lund& Co har rekna seg fram til at dette vil handla om 350 til 400 mill kr. Forslaget inneber at dei som tener på omlegginga er bedriftene og staten, medan kommunane vert taparen.

Høyringsfristen er sett til 18. september 2015.

Kommunestyret i Øygarden handsamar saka i ekstra kommunestyremøte den 9. september 2015.

2. Forslag til endring av eigedomsskattereglane

Etter gjeldande regler skal arbeidsmaskiner m.v. takast med i eigedomsskattegrunnlaget for verk og bruk når dei vert vurderte å vera "ein part av sjølve føretaket". I høyringsnotatet frå regjeringa vert det lagt fram to alternative forslag til endring:

«*Alternativ 1: innebærer at produksjonsutstyr og –installasjoner skal fritas for eiendomsskatt. Alternativ 2: fjerner verk og bruk som egen kategori og det vil derfor ikke lenger være mulig å kun ha eiendomsskatt på verk og bruk. Verk og bruk vil dermed eiendomsbeskattes som alminnelig næringseiendom. Dette innebærer at produksjonsutstyr*

og –installasjoner fritas for eiendomsskatt, og det gir økt likebehandling mellom ulike typer næringsseiendom.

Eiendomsbeskatning etter reglene for alminnelig næringsseiendom medfører også at gjenanskaffelsesprinsippet ikke lenger gjelder som hovedregel for verdsettelse. Ingen av alternativene medfører endringer i verdsettelsen av vannkraftanlegg.

Målet er å gjøre utskrivningen av eiendomsskatt mer forutsigbar og at eiendomsbeskatningen av verk og bruk blir mer lik eiendomsbeskatningen av andre næringsseiendommer».

I begge dei alternative forslaga er det gjort framlegg om å fjerna «produksjonsutstyr- og installasjoner» frå eignedomsskattegrunnlaget for verk og bruk. I alternativ 2 heiter det i tillegg at «verk og bruk» vert fjerna som eigen kategori. Begge alternativa inneber i realiteten ei svært omfattande avvikling av eignedomsskatt på «verk og bruk», og kommunane vil berre stå att med eignedomsskatt på bygning og tomt. I Øygarden har me berre eignedomsskatt på verk

og bruk, og me kan difor heller ikkje sjå den store skilnaden i høve til konsekvensar for kommunen ved dei to alternativa. Høyringssvaret tek difor som utgangspunkt at begge alternativa vil ha relativt like store konsekvensar for kommunen, og rådmannen skil ikkje mellom desse i dei vidare vurderingane om saka.

Endringa inneber at produksjonsutstyr- og installasjonar ikkje lenger skal reknast med i skattegrunnlaget. Forslaget omfattar at ein går bort frå regelen om produksjonsutstyr som ein integrert del av produksjonsanlegget skal vera skattepliktig, til ein regel om produksjonsutstyr ikkje lenger skal skattleggjast. I tillegg vert omgrepet produksjonsinstallasjonar introdusert. Omgrepet «produksjonsutstyr» er i høyringsnotatet gitt ein vid definisjon. Det er meint å omfatta alle egedelar som har ein funksjon i produksjonsprosessen. Til dømes maskiner som vert nytta til maskinell bearbeiding av råvarer, og som det i følge høyringsframlegget omfattar alt produksjonsutstyr, utan omsyn til grad av fysisk integrasjon i bygg eller grunn.

Departementet legg til grunn at vesentlege deler av dei store industrianlegga vil verta omfatta av omgrepet, slik at berre tomt og bygningar vert att i eignedomsskattegrunnlaget. Det nye omgrepet «produksjonsinstallasjoner» vil omfatta meir enn det som i dag er å sjå på som arbeidsmaskinar, og meir enn høyringsframleggets definisjon av produksjonsutstyr. Departementet trekkjer eit skilje mellom installasjonar som tener produksjonen og installasjonar som tener bygningen. Ein kvar bygningsmessig installasjon som kan seiast å tene produksjonen vil vera fritaken, mens installasjonar som tener bygningen vil vera skattepliktig. Heisanlegg og ventilasjonsanlegg er nemnt som døme på installasjonar som tener bygningen.

Slik omgrepet er definert av departementet, vil det føra til at mellom anna petrokjemiske anlegg, teleanlegg, overføringslinjer for kraft og liknande infrastruktur- og hjelpeanlegg i det alt vesentlege vert fritaken for eignedomsskatt. Dette er anlegg som ikkje inneheld bygningar, men berre installasjonar som skal fremja produksjonen.

I høyringsnotatet skriv departementet at forslaget vil gi ei klarere og mindre skjønsmessig avgrensing enn dagens regel, då den vanskelege vurderinga av om produksjonsutstyret er tilstrekkelig integrert i anlegget vil falle bort. Dette vil i følge departementet medføre lågare administrasjonskostnader for kommunen og færre tvistesaker. Departementet skriv også at forslaget vil medføre større likskap i eignedomsskattlegginga av verk og bruk og andre næringsseigedommar.

3. Estimert inntektsbortfall for Øygarden kommune

I høyringsnotatet er Øygarden kommune nemnt særskilt som ein av dei kommunane som vil tapa svært mykje på dei endringane som er skisserte. På side 31 og 32 i høyringsnotatet er dette omtala slik:

«De største utslagene i absolutte beløp vil man finne i kommuner med store industrianlegg, for eksempel Aukra, Lindås, Hammerfest, Tysvær og Øygarden. I hver av disse kommunene vil inntektsbortfallet trolig kunne bli i 100-millionersklassen».

Finansdepartementet er soleis klar over kva konsekvensar det får for kommunane om endringane i eigedomsskattelova vert gjennomførte. Øygarden kommune si samla inntekt frå eigedomsskatt er 155,1 mill. kr frå verk og bruk. Forslaget vil føra til eit bortfall av inntekter på om lag 117,5 mill. kr. I samband med at det frå hausten 2016 vert starta ei generell omtaksering i Øygarden kommune reknar me med at eigedomsskattegrunnlaget vil auka noko frå inntektsåret 2017. Øygarden kommune sitt stipulerte samla tap ved dei endringane som høyringsutkastet legg opp til er frå og med inntektsåret 2017 grovt vurdert slik:

Tal i mill. kroner

Anleggstype	Sum takst	Innstallasjon takst	Bygningar takst	Berekna kr. inntektsbortfall
Kollsnes anlegget	17 793	13 807	3 986	96,6
Sture anlegget	3 294	2 013	1 281	14,1
LNG-anlegg	485	437	48	3,0
Strøm	486	452	34	3,1
Tele/breiband/fiber	29	26	3	0,2
Oppdrett	56	51	5	0,4
Anna eigedom	22	9	13	0,1
	22 165	16 795	5 369	117,5


Rådmannen sitt førebelse estimat er at om lag 76% av eigedomsskatten i Øygarden vil falle bort som følge av regelendringane, og at om lag 38 mill. kr. vert att i kommunen. Som det går fram av oppstillinga, er ilandføringsanlegget for gass til Kollsnes det største eigedomsskatteobjektet i kommunen. Det er liten tvil om at den største delen av verdien er integrerte maskiner og utstyr, under dette også alle røyrleidningar til og frå anlegget. Bygningane i seg sjølv gjev ikkje dei store inntektene. Desse anlegga er det få av i landet, og endringa rammar soleis få kommunar, men storleiken på inntektstapet for alle desse kommunane er enorme. Som det går fram av oppstillinga ovanfor, vil føreslåtte endringar ramme mange andre kommunar utover kommunar med ilandføringsanlegg. Nettanlegg, kraft og teleanlegg vil gjelda for heile landet, og mange industrikommunar vil sjå svært store konsekvensar av dei føreslåtte endringane.

4. Samla vurdering av høyringsframlegget

Øygarden kommune fekk ilandføringsanlegg for olje til Sture i 1985 og prosessanlegget for gass kom til Kollsnes i 1996. Grunnlaget for at kommunen har vore positiv til etablering av ilandføringsanlegga har vore knytt til den samfunnskontrakten som vart inngått mellom kommunen og utbyggjarane. Kommunen gjorde vedtak om å innføre eigedomsskatt på verk og bruk då anlegga vart etablert. Øygarden kommune er ikkje meir enn 66,5 km², og olje- og gassanlegga bandlegg heile 14% av arealet som kommunen ikkje kan nytta til andre føremål.

Øygarden kommune har avgrensa tilgang på areal og vatn. Det er difor både rett og rimeleg at kommunen vert kompensert for dei store industrietableringane.

Folketalsutviklinga og økonomien hadde dårlege kår før olje- og gassetableringane kom til kommunen.



Oljeanlegget på Sture 1985, gassanlegg på Kollsnes 1996

Eigedomsskatten vart gradvis auka til 7 promille, og gjorde det mogleg å byggja ut kommunens infrastruktur og rusta opp dei kommunale tenester til ein etter kvart god standard.

Høyringsalternativa inneber at Øygarden sine driftsinntekter vert reduserte med om lag 117,5 mill kroner. Dette utgjer om lag 23% av vårt samla inntektsgrunnlag, og er inntekter som vert nytta til å finansiera ordinære kommunale tenester som skular, barnehagar, helse og omsorg, med vidare.

I høyringsforslaget vert det lagt opp til bortfall, og ikkje til overgangsordningar eller andre avbøtande tiltak. Kommunane sjølv er bedne om å spela inn kva som kan vera erstatning for bortfall av eigedomsskatteinntektene.

Det er vanskeleg å sjå for seg korleis ein kan ta ned driftsutgiftene med så store beløp frå 2017. Det vert vidare opplevd som eit brot på samfunnskontrakten å måtte ta ned drifta så mykje, sjølv med ein lang overgangsperiode.

Eventuelle overgangsordningar

Eit inntektstap estimert til 117,5 mill kr for Øygarden kommune eller 23% av samla inntekter som fell bort ved eventuell iverksetjing frå 2017 vert svært krevjande å gjennomføra med tilsvarende kostnadskutt innan kommunen sine tenestekområde. I finansdepartementet sitt høyringsnotat er det klarlagt at iverksetjing skal skje frå 2017 i samband med omlegging av inntektssystemet. Det vert ikkje sagt noko om eventuelle overgangsordningar for kommunar som vert råka av inntektsbortfallet, og heller ikkje noko om korleis inntektsbortfallet kan kompensast i det sentrale inntektssystemet eller på annan måte.

Regjeringa foreslår endring av fordeling av selskapsskatten der 1%-poeng av dagens satt på 27% vert attendeført til kommunane. Modellen byggjer på ein fordelingsnøkkel basert på fire års gjennomsnittlig lønsvekst i privat sektor. Den nye modellen vert innarbeida i statsbudsjett 2017. Rådmannen kan ikkje sjå at denne fordelinga av selskapsskatten kan kompensera for bortfall av eigedomsskatt på verk og bruk. Endringa må sjåast i samband med varsla endring av kommunanes inntektssystem.

Når det vert lagt opp til større endringar i inntektssystemet er det vanlig at innføring skjer over tid, og ofte då som eit nullsumspel. Spørsmålet er korleis departementet tenkjer seg at eit inntektstap i kommunesektoren på 1,5 til 2 milliardar kroner skal finansierast. Dette er ei uvanleg tilnærming og rådmannen stiller seg undrande til at det ikkje er sagt noko om dette i høyringsnotatet.

Eigedomsskatt på bustad og anna næringsliv

Departementet peikar i høyringa på at: *«Begge de skisserte alternativene vil innebære betydelige skattelettelser for næringslivet i kommuner som har innført eiendomsskatt».*

Dette gjev, slik rådmannen ser det, ikkje eit heilt og komplett bilete av situasjonen. I Noreg i dag er det 88 kommunar som berre har eigedomsskatt på verk og bruk. Øygarden kommune er ein av desse. Det fører til at mykje anna næringsliv i tillegg til innbyggjarane i desse kommunane er fritekne for eigedomsskatt. Kommunestyret i Øygarden har ikkje vurdert å innføra eigedomsskatt på anna næringsverksemd. Om høyringsforslaget vert vedteke må kommunen sjå etter andre inntekter som kan kompensera for det store inntektstapet. Innføring av eigedomsskatt både på anna næring og bustader/fritidshus kan verta innført. Det vil føra til at næringslivet samla sett, og innbyggjarane i Øygarden vil få eit auka skattetrykk. Samstundes vil det berre i mindre grad dekkja opp for kommunen sitt store økonomiske tap. Ein må i tillegg sjå for seg auka brukarbetalingar og auka gebyr som nye tiltak, utanom store tenestekutt.

Administrative konsekvensar av omlegginga

Departementet ber om kommunens vurdering av dei administrative kostnadane ved omlegginga. Det vert peika på takseringskostnadar for å skilja maskinar, bygg og tomt. Dette skiljet er ikkje tydeleg for eigedomane som er takserte i Øygarden. Kommunen har vedteke generell omtaksering av verk og bruk med verknad frå 1. januar 2017. Det vil då i større grad vera mogleg å gjera dette skiljet. I og med at me i utgangspunktet hadde tenkt å vidareføra takseringspraksis slik den har vore, vil taksering der me skil tydelegare mellom integrerte maskinar, tomt og bygg medføra meirkostnadar. Kor store dei er, kan me ikkje seia noko sikkert om. I høve til inntektstapet me vil få ved omlegging, vil dette likevel vera relativt avgrensa. Det er likevel eit poeng at ny taksering av andre næringseigedomar og bustader/fritidshus, vil gi vesentlege takseringsutgifter.

Avgrensing integrert utstyr – Tvistar

Etter gjeldande reglar skal produksjonsutstyr takast med i eigedomsskattegrunnlaget for verk og bruk, så langt utstyret er «ein part av sjølve føretaket». Departementet peikar i sitt høyringsnotat på at det er omfattande rettstvistar på dette området, med bakgrunn i at det er uklart kva som er integrert i ein eigedom, og kva som er laust utstyr. Departementet meiner at forslaget vil gi klarare og mindre skjønsmessig avgrensing enn regelverket me har i dag. Øygarden kommune har hatt eigedomsskatt på verk og bruk i om lag 30 år. I perioden har me hatt få klagesaker, dei me har hatt er løyst i overskattetakstnemnda. Ingen saker er ført fram for retten. Dette viser at kommunen handterer eigedomsskattesakene. Dei administrative kostnadane departementet meiner er ei utfordring, og alle tvistesakene dei er uroa for, er for Øygarden kommune sin del noko me ikkje kjenner oss att i, etter 30 år med eigedomsskatt på verk og bruk.

Eigedomsskatt som insentiv for næringsutvikling

Då Øygarden kommune fekk vedteke oljeanlegget på Sture og at gass skulle førast i land på

Kollsnes, var eigedomsskatt eit vesentleg insentiv for politisk tilslutning. Det var dermed ein del av samfunnskontrakten då anlegga vart vedtekne. At kommunen ville få eigedomsskatteinntekter var og ein føresetnad for at kommunen sa ja til etablering av ilandføringsanlegga. Dette kan synast som departementet ser bort frå i sitt høyringsutkast.

Også etablering av vindkraft- og andre industrianlegg vil med dagens lovverk gje kommunane eigedomsskatteinntekter. Nyetableringar av denne type anlegg har mange positive ringverknadar for anna næringsliv, og skaper vekst, ikkje berre i den kommunen som får etableringa, men også i nabokommunane. Dei endringane som er skisserte i høyringsnotatet, vil svekka kommunane sine insentiv til å vera positiv til nye etableringar.

Rådmannens vurdering merknader og tilråding:

Rådmannen ser det som uheldig at Finansdepartementet sender på høyring ei sak med store økonomiske konsekvensar rett før sommarferien når alle politiske møter er ferdige, og med ein svarfrist på berre 2 månadar. Det gjer at kommunen har fått svært lita tid til saksførebuing og politisk handsaming av saka. Kommunen har måtta flytte eit kommunestyremøte for å kunne svara innan høyringsfristen. Rådmannen finn det også noko underleg at departementet sender eit slikt framlegg ut på høyring, utan at det er gjort undersøkingar av kva inntektstap kommunane samla kan få ved endringa, og utan at det er klargjort korleis inntektsbortfallet blir føresett dekkja.

Høyringsnotatet tek heller ikkje opp prinsipielle sider ved eigedomsskatten, som handlar om lokaldemokratiet og det lokale sjølvstyret. Rådmannen meiner at det bør koma fram i høyringsuttalen at eigedomsskatt på verk og bruk er ein sentral del av «samfunnskontrakten» for slike anlegg, og var eit viktig insentiv for å få godkjent etablering. Rådmannen meiner det må ei fagleg utgreiing til, som ikkje minst tek med seg alle viktige samfunnsmessige konsekvensar ved ei eventuell ny lovendring.

I statsbudsjettet for 2012 vart det og lagt fram eit forslag om å frita ikkje-integrerte maskiner for eigedomsskatt. Regjeringa bestemte å leggja bort forslaget med slik grunngjeving:

«Det har ikke vært mulig å finne noen lovteknisk løsning som gir enklere regler som likestiller ulike typer næringseiendom uten å påvirke de berørte kommunenes økonomi på en uønsket måte. På denne bakgrunn har Regjeringen besluttet ikke å gå videre med saken»

Slik rådmannen oppfattar det, går dagens høyringsframlegg lenger enn tidlegare regjering sitt framlegg. I framlegget til endringar kommunane no skal ta stilling til, vert dei økonomiske konsekvensane større, ved at det i praksis berre vil vera bygningar og tomt som vil vera att som skatteobjekt. I den grad eigedomsskattelova er uklar i høve til avgrensing mellom det som er integrert utstyr og det som ikkje er integrert, bør departementet setja ned eit breitt samansett utval. Dette utvalet må også opplysa om alle viktige samfunnsmessige konsekvensar ei lovendring vil få.

Innstilling til vedtak/tilråding:

Øygarden kommunestyre viser til rådmannen sitt saksframlegg og vedtek høyringsuttalen om endringar i eigedomsskattelova med følgjande konklusjonar:

1. Kommunestyret er negativ til både alternativ 1 og 2 som gjeld endringar i

eigedomsskattelova.

2. Kommunestyret stiller seg kritisk eit lovforslag som fører til inntektstap på 117,5 millionar kroner utan forslag til korleis inntektsbortfallet skal kompenseras.
3. Kommunestyret meiner eigedomsskatt på verk og bruk er ein sentral del av samfunnskontrakten og eit sentralt vilkår for at kommunestyret har vore positiv innstilt til dei store naturinngrepa og bandlegging av areal.
4. Eigedomsskatten er ein kommunal frivillig skatt kommunen og som urimeleg vert «sagt opp» einsidig av regjeringa. Kommunen vert tapar av omlegginga, medan bedrifter som til dømes Statoil og Gassco saman med staten tener på omlegginga.
5. Øygarden kommune har hatt ei positiv folketalsutvikling med vekst på om lag 2000 innbyggjarar sidan 1985. Øygarden kommune hadde før dette tilbakegang i folketallet og ein dårleg kommuneøkonomi. Eit stort etterslep i tillegg til folkeveksten har ført til store behov for etablering og oppgradering av infrastruktur, bygg og tenestetilbod elles. Dette har kommunen finansiert gjennom eigedomsskatteinntekter frå olje- og gassetableringane på Sture og Kollsnes. Kommunestyret meiner at eigedomsskatten er ei etablert ordning som må få liggja fast. Den har eksistert i 120 år og har vore revidert så seint som i 2012 med nye reglar som er tekne inn i den nye eigedomsskattelova.
6. Kommunestyret meiner at foreslått endring i fordeling av selskapsskatten ikkje kan kompensera for bortfall av eigedomsskatt på verk og bruk.
7. Øygarden kommune er medlem av Nettverket for petroleumskommunar – NPK. Kommunestyret sluttar seg til felles høyringsuttale frå nettverket og høyringsuttale frå KS.
8. Endringane i eigedomsskattelova er omfattande og får store konsekvensar for kommunane. Om regjeringa likevel går vidare med framlegget etter høyringa, meiner kommunestyret at saka må greiast ut nærmare i eit breitt samansett lovutval som får i oppgåve å kasta lys over alle viktige samfunnsmessige konsekvensar av forslaget.

09.09.2015 Formannskapet

Rådmannen endrar forslag til innstilling med nye saksopplysningar og nytt tilleggspunkt (punkt 9)

Øygarden kommune skriv ut eigedomsskatt til 35 ulike verksemdar i kommunen av desse har åtte stk. lokalt eigarskap, sjå tabell under. Eigedomsskatt frå desse verksemdene er 0,3 mill. kr. som utgjer 0,22% av samla eigedomsskatt.

For Øygarden kommune utgjer dette ein svært liten andel av eigedomsskatteinntektene til kommunen.

Oversyn lokale bedrifter

Samla eigedomsskatt 2015 i Øygarden	21 709 013 783	155 152 996	
	Takst i kr.	Utskriven skatt i kr.	% av samla utskreven skatt
Rong Stål AS	2 773 000	19 411	0,01 %
Ivar Atle Blom Eiendom AS	1 936 000	13 552	0,01 %
Blom Fiskeoppdrett AS	9 550 000	66 850	0,04 %

Ulvøy Eigedom AS	8 819 000	61 733	0,04 %
Kollsnes Eiendomsselskap AS	3 909 000	27 363	0,02 %
Kåre Heggholmen Bilrep.	2 475 000	17 325	0,01 %
Hennco Laks AS	11 800 000	82 600	0,05 %
Vik Settefisk AS	6 700 000	46 900	0,03 %
SUM	47 962 000	335 734	0,22 %

Pkt 9

I Øygarden kommune vert det skriven ut eigedomsskatt til 35 ulike verksemdar, av desse har åtte verksemdar lokalt eigarskap. Eigedomsskatt frå desse verksemdene utgjer 0,3 mill kr (0,22%) av samla eigedomsskatt, og ein kan soleis seia at kommunen ikkje skattlegg desse verksemdene tungt.

Rådmannen si opprinnelege innstilling med nye opplysningar og nytt tilleggspunkt;

Røysting: Samrøystes vedteke.

FS- 050/15 Vedtak:

Rådmannen si opprinnelege innstilling med endring, nye saksopplysningar og nytt tilleggspunkt (punkt 9) vart samrøystes tilrådd.

09.09.2015 Kommunestyret

Innstillinga/tilråding frå formannskapet:

Røysting: Rådmannen si innstilling med tilleggspunkt 9 vart samrøystes vedteke.

KS- 056/15 Vedtak:

Øygarden kommunestyre viser til rådmannen sitt saksframlegg og vedtek høyringsuttalen om endringar i eigedomsskattelova med følgjande konklusjonar:

1. Kommunestyret er negativ til både alternativ 1 og 2 som gjeld endringar i eigedomsskattelova.
2. Kommunestyret stiller seg kritisk til eit lovforslag som fører til inntektsstap på 117,5 millionar kroner utan forslag til korleis inntektsbortfallet skal kompensast.
3. Kommunestyret meiner eigedomsskatt på verk og bruk er ein sentral del av samfunnskontrakten og eit sentralt vilkår for at kommunestyret har vore positiv innstilt til dei store naturinngrepa og bandlegging av areal.
4. Eigedomsskatten er ein kommunal frivillig skatt som urimeleg vert «sagt opp» einsidig av regjeringa. Kommunen vert tapar av omlegginga, medan bedrifter som til dømes Statoil og Gassco saman med staten tener på omlegginga.
5. Øygarden kommune har hatt ei positiv folketalsutvikling med vekst på om lag 2000 innbyggjarar sidan 1985. Øygarden kommune hadde før dette tilbakegang i folketallet og ein dårleg kommuneøkonomi. Eit stort etterslep i tillegg til folkeveksten har ført til store

behov for etablering og oppgradering av infrastruktur, bygg og tenestetilbod elles. Dette har kommunen finansiert gjennom eigedomsskatteinntekter frå olje- og gassetableringane på Sture og Kollsnes. Kommunestyret meiner at eigedomsskatten er ei etablert ordning som må få liggja fast. Den har eksistert i 120 år og har vore revidert så seint som i 2012 med nye reglar som er tekne inn i den nye eigedomsskattelova.

6. Kommunestyret meiner at foreslått endring i fordeling av selskapsskatten ikkje kan kompensera for bortfall av eigedomsskatt på verk og bruk.
7. Øygarden kommune er medlem av Nettverket for petroleumskommunar – NPK. Kommunestyret sluttar seg til felles høyringsuttale frå nettverket og høyringsuttale frå KS.
8. Endringane i eigedomsskattelova er omfattande og får store konsekvensar for kommunane. Om regjeringa likevel går vidare med framlegget etter høyringa, meiner kommunestyret at saka må greiast ut nærmare i eit breitt samansett lovutval som får i oppgåve å kasta lys over alle viktige samfunnsmessige konsekvensar av forslaget.
9. I Øygarden kommune vert det skriven ut eigedomsskatt til 35 ulike verksemdar, av desse har åtte verksemdar lokalt eigarskap. Eigedomsskatt frå desse verksemdene utgjer 0,3 mill kr (0,22%) av samla eigedomsskatt, og ein kan soleis seia at kommunen ikkje skattlegg desse verksemdene tungt.

Siri Fahlvik Pettersen
Rådmann

Siri Fahlvik Pettersen
Sakshandsamar

Dokumentet er elektronisk godkjent, og krev difor ingen signatur.